



Broj: 05-03-34-34-885-1/22.
Mostar, 16.05.2022. godine

Na osnovu člana 26. i 27. Zakona o visokom obrazovanju u Hercegovacko-neretvanskom kantonu („Službene novine HNK“, broj: 04/12), članova 18. i 19. Pravilnika o akreditaciji visokoškolskih ustanova i studijskih programa („Službene novine HNK“, broj: 04/14), rješavajući po zahtjevu visokoškolske ustanove Visoke škole za turizam i menadžment Konjic, broj: O-142/14 od 24.10.2014. godine, a na osnovu Preporuke Agencije za razvoj visokog obrazovanja i osiguranje kvaliteta, broj: 05-33-552-30/15 od 26.04.2022. godine, ministar Ministarstva obrazovanja, nauke, kulture i sporta, **d o n o s i**

R J E Š E N J E **O USLOVNOJ AKREDITACIJI VISOKOŠKOLSKE USTANOVE** **VISOKE ŠKOLE ZA TURIZAM I MENADŽMENT KONJIC**

I.

Uslovno se akreditira visokoškolska ustanova Visoka škola za turizam i menadžment Konjic.

II.

Rješenje o uslovnoj akreditaciji izdaje se na rok od dvije (2) godine.

III.

Visokoškolska ustanova je obavezna šest (6) mjeseci prije isteka roka iz tačke II. ovog Rješenja ponovno podnijeti zahtjev za akreditaciju.

IV.

Obavezuje se visokoškolska ustanova Visoka škola za turizam i menadžment Konjic da u skladu sa preporukama Komisije stručnjaka izvrši sljedeće :

- a) visokoškolska ustanova bi trebala da hitno razmotri i jasnije definiše odgovornosti i ovlaštenja formalnog tijela za osiguranje kvaliteta čija bi uloga, odgovornosti i aktivnosti bili jasno utvrđeni i dokumentovani u pravnim aktima;
- b) visokoškolska ustanova bi trebala da sistematski razmotri i jasnije definiše ulogu studenata u sistemu unutrašnjeg osiguranja kvaliteta;
- c) visokoškolska ustanova treba raditi na daljem i kontinuiranom povećanju vlastitih kadrova, doobukom i profesionalnim usavršavanjem;
- d) zbog aktuelnosti studijskog programa (naročito dijela koji se odnosi na turizam) Komisija sugeriše da visokoškolska ustanova motiviše svoje profesore, te da to planira kao svoj strateški cilj. VŠU ne posjeduje akt kojim je regulisano stručno i naučno usavršavanje osoblja, Pravila konkursa i način apliciranja za potencijalna sredstva kao i načini usavršavanja osoblja ne postoje niti su jasno definisani. Kartoni naučnih radnika nisu oformljeni kao niti interna baza za naučnim dostignućima nastavnog kadra niti postoji bilo kakav oblik praćenja i razvoja nastavnog kadra;

- e) zbog aktuelnosti studijskog programa (naročito dijela koji se odnosi na turizam) Komisija sugeriše VŠU da više planira i da motiviše svoje profesore na objavljivanje, izdavanje stručnih časopisa, knjiga, itd., te da se taj proces planira kao jedan od strateških ciljeva. Snažna preporuka Komisije bi bila da se mora dodatno potaknuti motivacija za pisanjem priručnika i udžbenika;
- f) analizirajući ukupan broj studenata, broj nastavnog i nenastavnog osoblja Komisija je mišljenja da bi visokoškolska ustanova u narednom periodu trebala da više pažnje posveti planiranju dodatnog prostora, a u cilju unapređenja ambijenta osiguranja kvaliteta i podržala njihovo efikasno korištenje.
Da visokoškolska ustanova sebe vidi, odnosno ima viziju da dostigne standarde elitne visokoškolske ustanove, a u vezi s tim, kao prvo, potrebno je obezbijediti adekvatne prostorne kapacitete i materijalno-tehničke uslove za nesmetano obavljanje nastave i naučno-istraživačkog rada;
- g) kako visokoškolska ustanova sebe vidi odnosno, ima viziju da dostigne standarde elitne visokoškolske ustanove a u vezi s time, kao prvo, potrebno je obezbijediti adekvatne informatičke kapacitete (licencirani softver potreban za postizanje ciljeva učenja na studijskim programima) i ostale tehničke preduslove za nesmetano obavljanje nastave i naučno-istraživačkog rada. Kao posebno kritično mjesto jeste činjenica da Internet nije dostupan u prostorijama te je na taj način onemogućeno studentima korištenje sadržaja na web linku VŠU.
- h) predloženi model studija treba da omogućiti da već postojeći visokoškoloovani kadar s odgovarajućih smjerova, dobije novi jedinstveni korpus i kvalitet znanja iz oblasti turizma i menadžmenta, i na taj način, u budućnosti obezbijedi značajan doprinos i potporu unapređenju segmenta kulture kvaliteta BiH. Konačno, budući svršeni studenti treba da doprinesu podizanju nivoa kvaliteta i efikasnosti cjelokupnog BiH obrazovnog sistema, posebno na polju ispunjenja evropskih standarda u domenu obrazovanja i ostvarivanja ljudskih prava.

V

Rok iz tačke II. ovog Rješenja počinje da teče od dana pravosnažnosti Rješenja.

O b r a z l o ž e n j e

Visokoškolska ustanova Visoka škola za turizam i menadžment Konjic je podnijela Ministarstvu obrazovanja, nauke, kulture i sporta zahtjev za institucionalnu akreditaciju, broj: O-142/14 od 24.10.2014. godine.

Zaključkom broj: 05-03-40-1998-1/15 d 23.01.2015. godine Ministarstvo je zatražilo da visokoškolska ustanova Visoka škola za turizam i menadžment Konjic dopuni zahtjev za institucionalnu akreditaciju.

Traženu dokumentaciju za dopunu zahtjeva za institucionalnu akreditaciju Visoka škola za turizam i menadžment Konjic je dostavila aktom broj: O-29/15 od 26.02.2015. godine.

Ministarstvo obrazovanja, nauke, kulture i sporta je zahtjev sa popratnom dokumentacijom dostavilo Agenciji za razvoj visokog obrazovanja i osiguranje kvaliteta, sa prijedlogom za imenovanje članova Komisije stručnjaka na osnovu kojeg je Agencija donijela Rješenje o imenovanju Komisije domaćih i međunarodnih stručnjaka koji daju ocjenu i obavljaju pregled kvalitete i daju preporuke o akreditaciji visokoškolske ustanove Visoke škole za turizam i menadžment Konjic, broj: **05-33-1-552-4/15 od 12.10.2015.** godine.

Nakon obavljene posjete visokoškolskoj ustanovi Visokoj školi za turizam i menadžment Konjic, Komisija stručnjaka je imala obavezu da postupi u skladu sa čl.1. Ugovora o djelu te da kompletira Izvještaj vezano za akreditaciju Visoke škole za turizam i menadžment Konjic u roku od petnaest (15) dana i isti dostavi Agencija za razvoj visokog obrazovanja i osiguranje kvaliteta, na osnovu koga bi ista izdala preporuku o akreditaciji.

Dana **14.03.2016. godine** Ministarstvo je zaprimilo akt Agencije broj: **05-33-1-552-17/15 od 18.02.2016. godine** kojim se dostavlja Ministarstvu informacija o radu Komisije stručnjaka gdje se između ostalog navodi da su došli do saznanja da jedan od članova Komisije stručnjaka dovodi u pitanje integritet procesa akreditacije pomenute visokoškolske ustanove.

Kako u ovom postupku akreditacije Komisija nije mogla postići konsenzus po pitanju ocjene ispunjenosti kriterija, a samim tim i ishoda akreditacije, te su Agenciji dostavili dva odvojena Izvještaja: jedan potpisan od strane tri člana Komisije, a drugi je odvojeno poslala predstavnicima međunarodnih stručnjaka.

Ministarstvo je aktom broj: **05-03-40-1998-10/14 od 06.04.2016. godine** uputilo zahtjev svim članovima Komisije stručnjaka za kompletiranjem Izvještaja Komisije stručnjaka za akreditaciju Visoke škole za turizam i menadžment Konjic.

Također, Ministarstvo je aktom broj: **05-03-40-1998-11/14 od 27.12.2016. godine** zatražilo od Agencije za razvoj visokog obrazovanja i osiguranje kvaliteta informaciju vezano za akreditaciju navedene ustanove.

Aktom broj: **05-33-1-552-24/14 od 07.02.2017. godine** Agencija je dostavila informaciju Ministarstvu o postupku akreditacije visokoškolske ustanove Visoke škole za turizam i menadžment Konjic o tome da je donesen zaključak u aprilu 2016. godine da Ministarstvo traži od Komisije stručnjaka da dostave jedinstven i objedinjen izvještaj.

Kako je Ministarstvo već jednom uputilo zahtjev svim članovima Komisije stručnjaka za kompletiranjem izvještaja, to je ponovo aktom broj: **05-03-40-1998-12/14 od 04.05.2017. godine** poslalo urgenciju svim članovima Komisije stručnjaka po pitanju kompletiranja Izvještaja Komisije, čime bi se omogućilo poduzimanje aktivnosti kako od strane Agencije tako i od strane Ministarstva, a sve u cilju nastavka procesa akreditacije navedene ustanove

Ministarstvo je uputilo Agenciji, kao jednom od učesnika procesa akreditacije, akt broj: **05-03-40-1998-13/14 od 18.05.2017. godine**, urgenciju kojom je zatražilo od Agencije, da i ona uputi urgenciju članovima Komisije stručnjaka za kompletiranjem izvještaja vezano za akreditaciju visokoškolske ustanove Visoke škole za turizam i menadžment Konjic, u namjeri da se postigne svrha i cilj procesa akreditacije.

Aktom broj: **05-33-1-552-26/15 od 30.05.2017. godine** Agencija je dostavila odgovor Ministarstvu kojim navode da je Agencija povodom predmetnog postupka uputila dopis Ministarstvu 07.02.2017. godine u kojem je predložila ponavljanje postupka akreditacije Visoke škole za turizam i menadžment Konjic, te je u istom aktu naglasila da se insistiranjem na objedinjenom izvještaju Komisije stručnjaka, 18 mjeseci nakon njihove posjete visokoškolskoj ustanovi Visokoj školi za turizam i menadžment Konjic neće postići efekat osiguranja kvaliteta cijelog procesa.

Dana **15.03.2022. godine** u Mostaru je održan sastanak direktora i zamjenice Agencije sa predstavnicima Ministarstva i predstavnicima Visoke škole za turizam i menadžment Konjic, a sve u cilju iznalaženja rješenja vezano za predmetnu akreditaciju, budući da u okviru uobičajenih tumačenja i primjene postojećeg pravnog okvira kojim je regulisan složeni postupak akreditacije visokoškolskih ustanova nije moguće iznaći rješenje za nastalu situaciju.

Uzimajući u obzir složenost i obimnost preporuka za unapređenje koje je dala većina članova Komisije stručnjaka visokoškolska ustanova ima obavezu da po prijemu rješenja o uslovnoj akreditaciji detaljno analizira preporuke Komisije stručnjaka i napravi Akcioni plan za poboljšanje i unapređenje sistema kvaliteta u skladu sa Pravilnikom o akreditaciji visokoškolskih ustanova i studijskih programa HNK, („Službene novine HNK“, broj: 04/14), koji obavezno objavljuje na svojoj web stranici.

Akcioni plan sadrži popis aktivnosti usklađenih sa preporukama iz ovog Rješenja, a koje su sadržane u Izvještaju Komisije o eksternoj evaulaciji, vremenski okvir za realizaciju aktivnosti, te konkretne nositelje tih aktivnosti.

Visokoškolska ustanova Visoka škola za turizam i menadžment Konjic nakon postupanja u skladu sa preporukama utvrđenim u tački IV. dispozitiva ovog Rješenja, obavezna je šest (6) mjeseci prije isteka roka utvrđenog u tački II. istog, ponovo podnijeti zahtjev za akreditaciju u skladu sa čl. 19. Pravilnika o akreditaciji visokoškolskih ustanova i studijskih programa u HNK.

Na osnovu Preporuke Agencije za razvoj visokog obrazovanja i osiguranje kvaliteta i u skladu sa Izvještajem i mišljenjem većine članova Komisije stručnjaka, Ministarstvo obrazovanja, nauke, kulture i sporta je cijenilo da su ispunjeni svi propisani uslovi za izdavanje uslovne akreditacije podnosiocu zahtjeva.

Imajući u vidu gore navedeno odlučeno je kao u dispozitivu ovog Rješenja.

Po jedan primjerak ovog Rješenja dostavlja se visokoškolskoj ustanovi Visokoj školi za turizam i menadžment Konjic i Agenciji za razvoj visokog obrazovanja i osiguranje kvaliteta BiH u cilju poduzimanja radnji i mjera propisanih Okvirnim zakonom o visokom obrazovanju u BiH, Zakonom o visokom obrazovanju Hercegovačko-neretvanskog kantona i Pravilnikom o akreditaciji visokoškolskih ustanova i studijskih programa Hercegovačko-neretvanskog kantona.

Pouka o pravnom lijeku:

Protiv ovog Rješenja može se podnijeti žalba Vladi Hercegovačko-neretvanskog kantona u roku od trideset (30) dana od dana prijema istog. Žalba se podnosi putem Ministarstva obrazovanja, nauke, kulture i sporta Hercegovačko-neretvanskog kantona.

Dostaviti

1. Visoka škola za turizam i menadžment Konjic
Ul. Varda 1, Društveni dom, 88400 Konjic;
2. Agencija za razvoj visokog obrazovanja i osiguranje kvaliteta BiH
Ul. Akademika Jovana Surutke 13, 78 000 Banja Luka;
3. a/a.

